

**Uunga siunnersuut: Ilageeqarneq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq**  
(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

## **Akissuteqaat**

### **Aappassaaneerneqarnera**

Naalakkersuisut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq suliaanut aamma isumaliutissiisummut tunniunneqartumut qutsavigaat.

Ataatsimiisitaliaq allannguutissatut siunnersuummik saqqummiussisimavoq, tassani akiliisitsisarnissamut piumasaqaat pillugu aalajangersagaq peeqquneqarpoq. Allannguutissatut siunnersuut isumaliutissiisummi tunngavilersorneqarpoq, oqaluffik kikkunnut tamanut ammasuusariaqartoq, tamatumani apeqqutaatinnagu maani najugallit imaluunniit takornarissat inuiaqatigiit oqaluttuarisaanerpullu pillugit ilisimasaqarnerunissamik kissaateqartunut. Ataatsimiititaliaq allappoq, tamanna oqaluffimmi naalagiartoqartinnagu pulaarnissami akiliisarnissamut siunnersuut akerliusoq. Naalakkersuisut tamatumunnga isumaqataangillat.

Naalakkersuisut isumaqataapput oqaluffik, Kalaallit Nunaanni Ilagiit, ammasuussasut. Kisianni Naalakkersuisut isumaqarput, matumani pineqartoq, kinaagaluaraanniluunniit oqaluffimmut isersinnaasoq. Tamannali imaanngilaq, oqaluffik ulloq unnuarlu kikkunnut tamanut ammassasoq. Aammami ullumikkut taamaanngilaq. Oqaluffimmi naalagiartoqarnerata avataatigut allaffissornermik peqquteqartumik oqaluffiit matoqqasarput. Taamaanngitsuuppat tillinniartoqarsinnaanera aserorterisoqarsinnaaneralu aarlerinaateqassagaluarpoq, oqaluffiit nakkutigineqanngippata.

Taamaattumik siunnersuutip akuersissutigineratigut oqaluffik suli kikkunnut tamanut ammassaaq. Tamanna allanngortinneqassanngilaq. Taamaattumik Naalakkersuisut uggoraat, tunngavilersuut taanna tusarniaaffigineqartut ilaasa oqaatiginninnerisigut, siunnersuutip itigartinneranut tunngaviusutut atorineqarmat. Naalakkersuisut tusarniaaffigineqartunut tunngatillugu maluginiarpaat, Visit Greenlandip tusarniaanermi akissutini aallartillugu allamat, Visit Greenland oqaluffimmi naalagiartoqartinnagu oqaluffimmut pulaarnermi akiliuteqartitsisalernissaq piumasarineqarusummat. Isumaliutissiisummi Visit Greenlandimit erseqqissarneqartoq tassaavoq, Visit Greenlandip akiliisitsisalernissamut aalajangersakkami sunarpiaq tamakkiisumik pineqarnerasoq oqaaseqarfiginngimmagu, tamannalu tamaat isigalugu iluamik ersersinneqanngimmat.

Ataatsimiisitaliap taarsiullugu isumaliutissiisummi kaammattuutigaa, Naalakkersuisut Biskoppi suleqatigalugu Ilagiit Sinniisai naapinniassallugit periarfissanik allanik ujarlissasut, aammalu Ilagiit Sinniisai aningaasat Biskoppip atugassatut akuersisai atorlugit oqaluffiit naalagiartoqartinnagu kajumissaatitut ammatinneqartarnissaat. Soorunami Naalakkersuisut

taamatut iliuuseqarusupput. Taamaattorli maluginiarneqassaaq, taamatut ikiorneq, soorlu allannguutissatut siunnersuummi oqaaseqaatini allaqqasoq, isertitassanik annaasaqaataassammat, naak aningaasat amerlanngikkaluartut.

Aammattaaq Ataatsimiititaliap isumaliutissiisummi Naalakkersuisut Ataatsimiititaliap naalakkersuisunut apeqqutaani nr. 12-imi akissutaat isumaliutissiisummi oqaaseqarfigaa. Ataatsimiisitaliap maluginiarpaq, naatsorsuutigilluinnarlugu, Naalakkersuisut akiliisitsisarnissaq inatsisikkut tunngavissaqanngitsoq, Inatsimmut Tunngaviusumut akerliusoq taamaasilluni unioqquutitsinerussasoq, Naalakkersuisut atorunnaarsikkaat. Naalakkersuisut biskoppeqarfimmit paasitinneqarsimapput, biskoppeqarfik oqaluffimmi naalagiartoqartinnagu oqaluffimmut pulaarnermut atatillugu akiliisitsisarnissaq pillugu assersuutini ikittunik takunninnermi tamanna erngertumik oqaaseqarfigisimagaat unitsillugulu.

Aammattaaq ilanngunneqarsinnaavoq, Naalakkersuisut siunnersuummut oqaaseqaatini tamanna siunnersuutip saqqummiunneranut taamatut tunuliaqutaasoq paasissutissiisutigisimangikkaat, tamanna siunnersuutip saqqummiunneqarnerani pingaarnersaanngimmat. Siunnersuutip saqqummiunneqarneranut tunuliaqutaasoq oqaaseqatigiini oqaatigineqareersoq taamaasilluni tassaavoq, Ilagiit Sinniisaat oqaluffimmi naalagiartoqartinnagu oqaluffiup ammasarnissaanik kissaateqarfigineqartarmata, kisiannili pissarsissutigineq ajoraat, taamaattumillu taamatut sullissinerup akilerneqarnissaa naammaginarloq. Siunnersuut taamatut iliornissamut tunngaviliissagaluarpoq.

Naalakkersuisut naammagisimaarlugu maluginiarpaat, Ataatsimiisitaliap siunnersuutit allat tapersorsorai, Naalakkersuisut siunnersuutip allannguutissaq allannguutissatut siunnersuummiittoq inaarutaasumik akuersissutigineqarnissaa siunertarlugu siunnersuut pingajussaaneerneqarnissaminut ingerlaqqissasoq inassutigaat.